

Masa depan Trengganu cerah

NEGERI Trengganu untuk beberapa lama secara relatif telah ketinggalan dari segi pembangunan sosio-ekonominya. Tetapi kekayaan minyaknya akan mengubah keadaan ini. Sekarang dianggarkan kadar pengeluaran minyaknya ialah kira-kira 100,000 tong sehari dan ini dijangka akan menjadi dua kali ganda dalam sedikit masa lagi. Hasil minyak yang telah mencapai \$80 juta untuk enam bulan pertama tahun ini mungkin akan melampui \$150 juta menjelang akhir tahun. Hasil kekayaan minyak ini telah menjadi asas untuk kerajaan merancang kemajuan dan pembangunan yang lebih pesat untuk Trengganu. Hasrat dan aspirasi kerajaan dan rakyat telah disuarakan dengan jelas oleh Datuk Seri Dr Mahathir yang ingin melihat Trengganu menjadi salah sebuah pusat perindustrian yang terbesar di negara ini.

Perkembangan industri minyak di kawasan laut negeri ini telah dengan sendirinya menjadi pendorong untuk membawa berbagai jenis kemajuan. Keperluan untuk membangun perusahaan-perusahaan perkhidmatan, terutamanya yang berkaitan dengan pembangunan sumber-sumber minyak dan gas, di bidang makanan, perumahan, pengangkutan dan perhotelan telah pun ketara. Langkah-langkah tertentu untuk membangun industri-industri ini telah bermula. Tetapi ternyata masa depan pembangunan industri Trengganu adalah tergantung bukan sedikit kepada sejauh mana Lembaga Kemajuan Trengganu Tengah (Ketengah) berjaya menghasilkan rancangan-rancangan pembangunan kompleks industri minyaknya yang merangkum antara lain sebuah kompleks pangkalan bekalan di Kemaman, sebuah kilang memproses gas di Kemasik dan sebuah kilang penapis minyak juga di pekan yang sama. Kerajaan telah merancang untuk membelanjakan \$1.5 ribu juta untuk menjayakan rancangan ini. Dengan hasil minyak yang ada keperluan kewangan akan dapat ditampung tanpa masalah. Kajian awal yang rapi yang telah dijalankan pasti dapat melicinkan proses perancangan dan pelaksanaan.

Tetapi kejayaan sesebuah program pembangunan yang menyeluruh seperti yang sedang berjalan di Trengganu ini memerlukan juga beberapa gejala lain. Sebagaimana yang telah disebut oleh Datuk Seri Dr Mahathir perubahan yang pesat memerlukan pengambilan sikap dan tindakan yang positif di kalangan semua golongan terutamanya ahli-ahli politik, pegawai-pegawai kerajaan dan rakyat sendiri. Sikap-sikap dan pandangan yang negatif mesti disingkirkan. Tempatnya harus diganti dengan hasrat ingin memburu kemajuan, ingin bekerja keras dan ingin sentiasa membuktikan yang kita sebagai suatu masyarakat benar-benar mampu untuk mencapai puncak kejayaan yang kita harapkan. Tegasnya aspirasi yang tinggi perlu disokong dengan sikap dan usaha yang gigih.